

23. maj

UPA2016/96

Tarnikkut nappaateqartut ikiorneqarusunnigitsut imaluunniit nappaatiminnik paasinninngitsut tungaasigut tarnimikkut nappaateqartut, peqqinnissaqarfiup kommunillu akornanni ataveqatigiinnerit naalakkersuinikkut sukaterniarlugit qanoq ililluta pitsanngorsaasinnaavugut?
(Inatsisartunut ilaasortaq Agathe Fontain, Inuit Ataqatigiit)

Siumumiit Inatsisartunut ilaasortap Agathe Fontainip Inatsisartunut oqallisissiaanut ima aallarniutigalugu Siumut sinnerlugu qujassaanga.

Oqallisissiaq imaannangitsoq uani qaqqinneqarpoq. Taamani Siumumiit isummavut imaattut anissavagut:

Tarnikkut nappaateqartuuneq assigiinngitsorpassuarnik nassuiaasersorneqarsinnaavoq aammalu nappaatitut nalunaarsukkat assigiinngitsuupput. Ilaatigut inunnguuseralugu pigineqareersut aammalu arlaatigut tarnikkut ikiligaanermi takkuttartut. Taamatutaaq aanngajaarniutinik atuinerup kinguneranik eqqarsartaatikkut napparsimalersoaqartar-luni.

Siumumiit oqaatigerusupparput isumaqaratta massakkut ernumanartumi inissisimalluta, pingaartumik nappaammik Skizofrenimik aammalu psykosemik nappaateqalertartut amerlassusaasa kisit-sisaat qaffakkiartupiloormat, aammalu taamatut nappaammik eqqugaasartut ukioqqortussutsimikkut ukiukilliartormata. Ilaatigut nappaatit taamaattut inuuneq naallugu paaqqutarineqartariaqarnermik kinguneqalersartut. Uani erseqqissassavara inunnguuserisamik nappaatigisat eqqartunnginnakkit. Siumumiit oqatiartuutigissavarput nappaateqalersartut nappannginnerini siusinaatumik iliuuseqarfigineqartariaqarnerata pimooruttuarneqarnissaa pingaartittuaratsigu aammalu aqqutissaasutut isigalugu.

Uanili Tarnimikkut nappaatillik qanoq ililluni eqaannerusumik sullinneqarsinnaanissaat ima isummersorfigerusupparput:

Inulerisunik nappaatinik pasitsaassisinnaanermut pikkorissaajuarneq aammalu nappaateqartunik pasitsaassinermi saaffiginniffissat ataqatigiinnissat pingaaruteqarluinnarpoq. Taamatuttaaq nappaatinik piaartumik suussusersisarnissaq eqqarsaatigalugu pingaarpoq tarnip pissusaanik ilisimasallik piaartumik pasitsaassisoqarsimatillugu susassaqtunit attavigineqarasuarsinnaanissaat.

Tassa Siumumit isumaqarpugut susassaqtut pisortallu ikioqatigiilluernerisigut tarnimikkut nappaatillik paasineqajaartarpata, pineqartunut ingerlariartitseqqinnissaq aammalu iluatsittumik inersimasuunermut ikaarsaariartinneqarnissaannut aqutissiuussilluarluni pinikkut nunatta iluaqutigilluarsinnaagaa.

Ilinniaqqissinnaanerup tungaatigut aqutit pitsaanagerusut atorneqarsinnaasariaqarput tarnimikkut nappaateqartunut.

Naggataatigut Siumumiit oqaatigissavarput Tarnimikkut innarluutillik innarluutaat suussusersinirlugu suliaqartut Tarnip pissusaanik ilisimasallik aammalu allat susassaqtut qutsavigigatsigut, siornatigorniit piginnaasaat suussusersinnittarnerallu pitsaanagerusumillu sullissilersimammata.

Ilaatigut Telepsykiatri periarfissaalerneratigut isorliuunerusuni tarnip pissusaanik ilisimasalinnik soqanngitsuni atorluarneqaleriartormat.

Taamatuttaaq Naalakkersuisut suliniuteqarnerannut qujajumavugut.